

虞山人誼

影元鈔本

元虞懋詩傳本有鼓世藁已不
多見厥本乃山人自定尤為罕異
矧鈔自元時原本耶 辛酉歲
葺題贈

相雪先生

珍藏

字



虞山人詩目錄

卷一

古體雜言

滄浪操

瞻雲操

觀山

朝陽篇

咸林行

自畫山居圖歌

桃花畫眉曲

龍眠居士六馬歌



釣魚操

老子騎青牛像

題柏子庭石菖蒲

良苦吟

自畫萬壑松風圖歌

畫山曲

巖居高士圖歌

瓢隱畫歌

朱澤民山水歌

張商畫竹歌

踏車謠

古意

朱叔仲山水引

紅梅引

鶴瓢

題衛明錄呪錢出井圖

題王牀明松亭雅集圖

題黃子久關山疊嶂圖

鑑湖春曉

題錢舜舉畫蚕桑圖

題顧定之竹

題王元章梅

山居圖

愛日堂

贈筆生施廷用

王使君席上次韻

贈星史汪清溪

畫雀篇

賦任公釣臺送王允劄

海上丹房聯句

卷二

近體五言

鼓枻

夜坐

送陶元庸

送馮令

送趙生航海

李檢校使吳

送相德謙之越

寄魏秉中表兄

重寄

寄潘隱君

柬倪季敏

寄鄧高士

寄徐生兼柬廉上人

贈周可久

贈澣天鏡講師

次韻石林上人

用唐綦母著作詩韻贈閑白雲上人

飛雲樓讌集

趙生席上

聽彈箏

與陸季弘對榻

讀陳天倪處士傳

中秋湖上看月

九日東樓次韻

十日對菊

十月十七夜舟中作

湖村夜泊

潯南書事

季丙卿留飲

謗興

江村漁隱

次韻洞庭秋晚

題朱荊仲山水卷

題陳松巢畫

登鑑湖樓

題文殊院壁

遲上人房次韻

題可賦軒

橫山蘭若次韻

題橫塘般若寺

聽雨樓

祚真精舍寓宿

詠高麗石琉璃

白雲閑為上人賦

對雪

山居次韻六首

送周伯昂

春夜聯句

絕句

滄波

舊事

詠異石

寓目

題醉李太白圖

海岸圖

題列子乘風便面

題青山白雲四首

題柯叅書竹二首

題倪元鎮竹樹

題顧定之出墻竹

題朱牀仲青山白雲

題陸季弘碧桃花

題章橫塘護花

題舍弟畫竹

為日本僧題梅花

題雲山欲雨卷

題陳慎獨畫

美人撲蝶圖

六言

吳江

靈巖寺

姑胥山

橫塘

盤門

石湖舊苑

題畫小景

題巖壑孤舟圖

題朱澤民書釣圖

題顧定之二篠

卷三

近體七言

汗漫遊

吳伯常家看桃花

山家看花

震澤

拜郊臺

望湖亭

闔廬浦

陳湖

嘉興水西寺

山家

遺老農

登穹窿山訪道士

書陶孝子傳後

旅懷

春興

謗興

聽朱秉中鼓琴

八月十五夜對月

與堅上人看月

江渚移居

山中獨夜有懷故人

漁船早起次韻

雨中王性中齋居寓宿

午日沈元吉席上次韻

宿普濟院

重宿瞻雲軒

施宜之隱雅宜山以柳道傳所撰墓文見示因詩奉酬

送馬民立之杭州

送張士阜歸閩

送張伯奇還花溪

送朱秉中之杭歸天台

送馬民立還官越上

送潘公穎還越葬乃父

重贈

送賈景莊航海之京

送顧仲贄四明歸觀

送瀚北海上人住靈岩寺

次韻送相德謙之台州別駕

送楊方外法師

贈黃山人

書贈錢公權

贈日本僧立藏主

旅贈王宗善

贈蔡霞外

贈單子貞併柬知仲義

贈筆工二沈生

茅掾之嘉興經歷因贈

訪潘公穎隱居

寄黃高士

寄馬民立并簡孟季成

寄徐生

寄鄧高士

寄王明仲

題王生画春山圖

為周伯昂題春山圖

題王泚明岩居羅漢

題汎湖詩卷

寄題沈士誠水竹居

書畊隱卷後

題季丙卿見示家藏詩卷

季丙卿還鄉

題贈筆生王純

寄題先月樓

余士平夢綵堂

野人家

看帆四首

題孫氏小隱湖樓

心遠樓

雪蓬軒

如舟亭

疇隱次韻

新歲次韻

次韻朱北窓阻雨由榻

次韻荅方彥修見寄

次韻陸高士見寄

次韻荅阮維則

次韻荅王性中二首

錢公權席上次韻

次韻荅公權見貽

次韻海上還

呂彥貞見寄次韻二首

次韻秋懷

用韻壽薛鶴齋

附

荅陳孟章省元

附

悼堅上人

讀饒介之遺徐允中書

夜飲聯句

絕句

西蜀二首

玉壘詞

三峽詞

錦官

宮詞

有所思

謗興四首

春日謗興六首

早春迷懷

花下把酒

春興二首

吳下口占

越來溪

過王夫人墓

昇公蘭若

登天池山

賦石屋

題渾淪菴

寄潘公頴

寄王明仲

贈筆工溫子敬

贈墨客李慶源

送達明善還嘉興

遺陳生

讀何水部詩集

留客聽琴

示陳起

遺陳童子

荅鄭長卿見寄

為弘侍者畫萱草

為規侍者畫天台圖

題十六應真圖

題陶靖節賦詩像

題諸葛武侯草庐像

題秋山樓觀圖

題宣和馬圖

題宋端孝公主所賦桂花

便面三首

題趙松雪出浴人馬圖

題趙松雪畫四首

題趙仲穆人馬圖

題陳慎獨竹樹圖

題倪雲林竹樹圖

題衛明鉉林居圖

題徐士元釣隱圖

題吳江送別圖

題吳江春晚圖

題竹樹圖送陳君玉

題王思齊雪溪卷

題趙魏公搭瘡馬

題柯博士竹二首

題黃道人畫

為李可道題樓臺圖

題蘇小小真

題木筆仕女

題夾竹桃花畫眉

題李安忠猿鵲圖

題江臯會飲圖

為王允同題荆溪圖

題陳慎獨寒林竹樹

題盧益脩水仙

題陸季弘碧桃花

題陸季弘畫竹 二首

題堅石林上人松下相

題石壁高僧圖

題石林圖

題夏山圖

題盛子昭會琴圖

題孟仲良雪中才子

題張道士畫幀

題倪雲林畫竹

題護花園

題倪雲林畫 二首

題王生畫幀

題盛子昭釣船圖

題倪雲林畫

題江山臺觀圖

題衛明鉉吹笙圖

題張焄厚吹簫圖

題佛圖澄故實

錦帶花絕句

次韵分菊

次韵荅韓景中見寄 二首

倚樓次韵

戲荅聖公木犀

賦紅白梅 四首

題普大雲梅花水仙 三首

題日本僧畫

題忻悅道雲山圖

題水月齋梅影圖

牧心齋題壁

題刘商觀奕圖

題和靜處士觀梅圖

虞山人詩卷之一

古體雜言

滄浪操

孺子鼓柁作

汎滄浪猗毋泊我舟通汗漫猗毋遏我游彼湛々猗既玄以黝
物擾擾猗其盍以脩夫滔々猗吾寧與休孰知我猗不我為儔
歎自取猗徒者惟由

釣魚操

瞰滄江而盤礴閱浮雲之卷舒物悠々其永逝吾何心而釣魚

瞻雲操

維蒸之麓兮蔚乎蒼々英雲下被兮吾親永蔽雨露霑濡兮焄
蒿悽愴嗟親之逝兮其何以往瞻雲之興兮汎乎喬林慨思吾



親兮憂集于心烏翩兮且止猿啾兮夜吟灌鬱椒兮徹泉之
下泣松楸兮零于宿莽憾吾生兮茹茲荼苦抱終天兮終古

老子騎青牛像

孰知而傳象帝之先始生八十終言五千度關青牛西邁不還
若有見者乃猶龍然

觀山

山無垢色雲無住心達人觀之其高且深

題柏子庭畫石菖蒲

蹲此於菟直將爾鬚大嘯一声風清月孤

朝陽篇 書唐氏子暹祝辭後

大明隱蒙汜韜韞萬世先三浴一出海盈三上扶桑發機遂動

息幽眇復張皇融結川嶽麗昭回雲漢章所以賜谷賓若稽在
陶唐希天建至極放勳被遐荒悠三則萬聖蕩三名無疆孰云
時害喪違之靡不忘三綱既淪斃九法遂乖張斯須浸頗僻終
古失馨香餘腥穢藺帛烏得垂衣裳參兩詎無端秉彛寔有常
暹也父命名欽哉究元良求之得餘師字之以朝陽鳳凰不世
有維時鳴高岡覽輝用比德景瑞期遠翔文獻乃足徵嘉言斯
孔彰冠禮久已廢請訓獨可尚儼如三加祝賓主迭在堂虞坐
鄙何述斐然不知量觀象詠元化稽經陳否臧希天復希聖質
說幾茫茫易稱健不息君子當自強惜陰既云哲失道還受傷
夙夜審出處悠久慎行藏羣物豈違忤欣三樂其昌顛沛造次
間操德其何爽勗哉保厥始壽考有餘慶作詩以咏歎永矢慎

勿忘平旦再仰察庶幾予匪狂

良苦吟為馬元尋母得見作

水流豈無源草生固有根東風洄驚瀾吹此野燒痕亂離失母
痛割腸難斷思念如西慈烏飢號各孤騫烟迷太湖渚霜墮吳
會門七年一朝見九起萬死魂瀾沿革復茁尺蠖信乾坤上承
高蓋旋景入無永昏下憑大載安轍窮有回轅衣破淚始滅哭
絕聲始吞始命苟有逆終而不洗冤春暉轉忘憂式復念倚門
翻思在離別豈料俱生存餘懽菽粟具辛苦勿出言我歌良苦
吟頑薄當彌敦

咸林行為楊壘改葬乃祖作

餘杭山前百戰場疾藜滿道多虎狼黃塵茫茫白日慘子獨往
也良慨傷深衷憤不畏狼虎極目蒼天淚如雨蒼蒼蓋高愁奈
何腸斷咸林一杯土黃腸下深九仞泉我翁瘞此今百年朱轡
玉節久寂寞黃鸝碧草空留連回首東吳三百里無限好山并
好水誓收寒骨悶幽函與翁來歸此山裏佳城再卜再封樹麥
飯椒漿好時祀慈烏還來共栖止慰我生存保終始嗟哉楊公
好孫子人生蜉蝣在天地間閔誰復顧生死骨肉之恩深固如
此嗟哉楊公好孫子

自畫萬壑松風圖歌贈天台朱秉中梅花巢

天台萬八千丈山桃花久不流人間上當牛斗開天閔仙人幾
度招我窮幽攀瓊臺玉闕迴寂寞石橋且滑空潺湲曾識高人
姓朱者讀書縛屋蓮峰下一從畫得龍馬神龜文走獻天子登

天閣天子莫可官歸來老田野最喜兩兒郎綠髮更瀟灑大者
賦遠遊不肯卑微休仲也誰與儔愛我畫滄洲聊將水墨趣寫
此空岩秋鴈蕩雲連赤城暮瀟湘兩裏蒼梧愁我愛仲也琴傾
耳大賞音南風散五絃為我開煩襟棲鳥夜啼秋月墮黃鸝曉
轉春花深君不見畫中絕是琴中趣萬壑秋風滿松樹應有梅
花可結巢隨意青山看雲去

自畫山居圖歌贈宜春朱隱君字安道地理學專門

朱侯有隱居迺在宜春間東遊久未已浩蕩忘其還山川神氣
具在眼窮幽蹟隱知何限黃河之源出崑崙千里萬里盤旋屈
折支天根自從開闢分九州大噫噉噉生氣浮綿延亘接無盡
頭奔澎不息入海流海門限水迴蛟蜃碣石排風駐馬牛從此

山川極甌粵秦王之石禹王穴朱侯朝覽赤城霞暮看陰山雪
山陰溪中釣魚者舊廬亦在青城下曾中丘壑渾天成手把風
雲自揮灑宵霽外鴻濛前來龍起伏頃刻真宛然長松古檜亦
偃蹇不似草三生風烟朱侯長相見談笑共剖目脫屣白石上
滄浪歌濯足愛山之癖奈侯酷聊以尋幽畫茅屋青山隔溪轉
白雲就簷宿不短挂猿藤頗長棲鳳竹畫成送侯當早歸越來
溪傍花正飛春山蕨長薺菜肥何待滿樹風雨鈎輶啼朱侯朱
侯此別勿歎惜一飯勸君當努力但將鷄犬深入雲莫管桃花
盡狼籍此畫掛向草屋壁讀書萬卷守勿失從教門前泥潦三
尺深三掩柴門莫輕出

自畫關山旅行圖因製畫山曲

三年不作畫一畫旅愁生家山萬里隔蜀道正難行蜀高山且
遠瞿唐水復險別來記得春水深此日欲去風塵滿風塵滿如
何成都西南愁翠蛾眉愁損人未歸杜鵑啼血朝飛杜鵑
飛向何處江南三月春十日九風雨每懷謝眺看青山安得草
堂留杜甫君不見杜甫悲歌一世豪南奔北走何其勞南奔北
走何其勞許身稷契愚且高

桃花畫眉曲

春禽踏南枝新柳拂蛾眉東風一何淺花間聲宛轉君不見秋
鳥一夜啼金井裁衣寄遠剪刀冷便是盧家窈窕娘愁對離鴛
亦斷腸寄遠一作念遠

巖居高士圖歌次韻

山高性所樂好山何處無平生樂山夜入夢神游歷皆方壺
浮雲滿空任紆卷把筆題詩傲軒冕長松如龍鱗滿身風雨年
季長蒼蘚結巢絕愛當巖阿平地白雲如湧波落葉蕭蕭作飛
雨自看山中秋色多日夕樵歌響幽谷啼鳥閑亂林木幾年
種木茅公山更羨漁舟武夷曲山中過慣真脫塵但看日月不
記春巖居高士莫笑我亦本是青城人自愧長年不歸去遇
舜逢堯竟忘慮一船烟雨在江南畫裡看山得真趣桃花水生
春尚寒西來雪嶺雪不乾出門千里更萬里無緣縮地何其難

龍眠居士畫馬歌

龍眠居士畫六馬神妙不在曹韓下始信天閑有六龍毛骨奇
權汗流赭鳳頭錦膊獅子花雄俊豈待奚奴誇騰霜叱撥好頭

赤馭氣競欲追風沙超驥一箇玉蝴蝶蹄如踏鐵眼燁直恐
翩便飛去一點春風正揚鬣君不見寧王畫馬花萼樓四海
八荒無事秋玉面之駘忽變化開元天子愛之亦莫留乃知龍
媒矯不世出自是龍池飛霹靂漢家封疆既混一天馬西來
勞貢錫海宇清平忘戰敵嗚呼海宇清平忘戰敵

瓢隱畫歌

溪山昨日風雨來溪上船子衝潮田白鷗微茫渡島嶼綠樹恍
惚迷塵埃烟昏氣黑夜滂渤石梁茅屋多傾頽壺公畫裡何悠
哉寫此世外之蓬萊弱水不渡良可哀

朱澤民山水歌

江山青江水綠市上何人吹紫竹避暑宮前不見春落花滿
地游麋鹿千古江山列畫圖朱侯解寫咫尺烟模糊扁舟依然
在洲渚應可自此歸五湖昔人去者今有無昔人去者今有無

張商畫竹歌

洞庭張商愛修竹放筆縱橫寫千幅世上今無玉局翁胸中自
有篔簹谷黃金易成金錯刀石室灑生秋毫鳳凰飛去空窠
窠張商落墨何其高

踏車謠

一春多風復多雨田頭踏車最辛苦去年種田無收還租賣
却牛一頭今季城西盜賊起北巷南村盡燒毀城頭土崩日夜
脩壯者服役老者憂晨食糟糠每忘晝妻子長飢面皮瘦公家
吃酒呼歌奴不念私家租不敷公家若念農家苦水滂祈晴旱

祈雨

古意

秉燭夜何長芳筵惜春暖鶯花已驚曙東風雜絃管還念戰場
人冰花鐵衣滿

朱叔仲山水引為鄒生作

看山朝不飯畫山夜不眠西蜀書生有此過傳癖呼鐙索酒忘
青年東吳朱家叔仲子愛畫更覺入骨髓清晨起來頭不梳快
展溪藤潑秋水長年買船上會稽耶溪雲門隨所之越人煮海
競取富孰肯相逐探幽竒歸來自喜胞腹飽磊砢崢嶸揮不了
東家幘子高丈尋落筆唯嗅烟嶂小鄒生拜揖長衣裾得畫一
紙七尺餘就中須得戴安道一丘一壑松兩株前年我亦畫匡
廬還有松巢安讀書昔年李太白最愛雲端蕙焦桐不着童子
抱先生自是乘藍輿仙人自在第九疊牧豎樵夫皆可居朱叔
子鄒陽生世俗那辨閑與荆齊君不好瑟王子自吹笙何當與
子坐待海晏風塵清更作崑崙頂上行

紅梅引次韻壺中老人一笑

羅浮山下春風來嫣然一笑毒花開東君底是愛顏色玉容重
著胭脂堆要人姑射朝天闕丹砂炯映肌膚潔天人自是實失
驚空谷何年見清絕又如十二飛瓊春酒醒絳紗籠玉尤分明
天棗繁杏便麗俗紛三艷冶徒相爭暗香不斷流丹髓三咽令
人銷鄙俚莫言春半不耐寒飽浥冰霜不知幾吾生痛飲自得
師對花爛醉高陽池朱顏顧我每如此壺公壺公如何鬢成絲

顛倒咲我為花揚酒卮

鶴瓢

青城黃仙師四海通行脚東觀滄溟萬里餘到時兩髻秋蕭索
手中常持一鶴瓢言是太古開花萼偃蹇渾無斧鑿痕分明洞
有烟霞爍青田一種至今無溟渤崑崙任抄掠一從箕泉遭棄
置便向華表為棲托自入行囊不計春長懸日月同飄泊彈弦
或奏太古調只與此瓢相對酌醉將北斗挽天潢肯把此瓢分
兩勺君不見伯牙絕絃無知音和氏獻璞遭殘虐世間俗子眼
眇瞎有耳徒能聽管籥安知老大葫蘆生小摘乾坤自成噉林
屋洞口種橘李山人平生讀書得真樂自是西周老聃生抱一
冲虛豈雕琢仙翁亦是無懷民大道迥出羲皇若禹穴南來一

邂逅握手談笑如識昨許以此瓢今可遺臨別要即重然諾謝
之拂袖去意若全落魄山人得之不敢卻左懸右佩貯靈藥有
時挂向青崖間脫屣捫蘿坐盤礴月明遼海夜生寒夢繞秋空
雙足躩迹來作者歌鶴瓢競說山人瓢不惡長歌短句我亦有
雨露雲煙詎穿鑿我歌不鑿瓢愈竒山人之名愈充擴李山人
莫驚愕我亦青城丈人客昔年西來覽丘壑幾迴晒髮太霞巔
至今尚負山中約瓢乎瓢乎爾知否一夕風高起朔漠瀟湘洞
庭木葉落爾今不蔓緜為瓢徒向人間受纏縛何當從今只化
鶴何當從今只化鶴為我戛然飛鳴一萬里長風浩一翔寥廓
為季丙卿題衛明鉉所畫呪錢出井圖

神仙好幻術驚世更駭俗笑移天地入壺中大塊輪囷等珠粟

葛仙鍊丹世所傳，呪錢出井飛上天。長生久視亦已矣，此事一說經千年。衛君亦是丹丘子，與我論交脫生死。昔年學仙差可耳，雅好樓臺今畫史。孤雲處士騎鯨去，文皇欲官輓不住。霧帶雲裾盡屬君，草一落筆成天趣。季卿何由得此圖，卻寫仙翁煉丹處。井氣空明泄海寒，丹光錯落闕天曙。蝦蟆秋飛老桂輪，子規夜叫長松樹。季卿父烈丈夫，年過五十山澤臞。手授神農之百草，口誦軒轅之古書。回生起死奪造化，陰德邁種為苗。膏肓二豎為哭泣，何物五鬼能撮斂。一道澄江自西下，十年賣藥留東吳。花飛苑奇秋霜薄，葉落江楓夜雨疎。每尋翁生說烹煉，更得果老稱名譽。只今又逢東海上，咫尺蓬萊隔烟浪。便持此畫問安期，舉手人間謝塵坱。

題王叔明為瑛上人所畫松亭雅集

仙人王子喬，吹笙度人世。天目山前騎鶴來，五彩虛空畫無際。岨嶮岡頭十八公，恰在已公茅屋東。要予賦詩請莫笑，石上精魂今古同。

題大癡道人黃子久畫關山疊嶂圖

老癡作癡便癡絕，畫山畫樹畫若鐵。想從憶昔少年游，飽在燕山度霜雪。重関複道盤層岫，萬水千山咫尺看。只今無復黃知命，脫去人間行路難。

鑑湖春曉

越王城南看春曉，湖上好山青未了。誰採芙蓉落鏡中，翠黛蜿蜒如可掃。賀公歸來酒滿船，幽花細戶春娟娟。手招南風鳴五

弦寫冲鶴翁今千年

題錢舜舉畫蚕桑圖

桑中鳴禽巧如鳩吳娘養蠶夜不歇暖雨寒風惱殺人政是江南三四月若溪遺老白髮公翁畫蠶畫葉思春風千金難買吳娘笑故寫生枝樵子紅

題顧定之竹

錄事官常州政是太平日想得鳳凰枝披髯揮彩筆直節應承雨露恩五色之雲護子孫而今飛向閩南去搖蕩春風化墨痕

題王元章梅

髯君畫梅若天造冰雪肝腸屢傾倒騎驢曾上燕南道罵人不識梅花好囊空無錢遂歸蚤把酒對花心慄慄夜半歌呼發酒狂縱說花王被花惱江南三月春風顛柳絮梨花不堪掃雪卷枝梢頗綴繁那侶山中昔懷抱憶君誓不委路草若欲尋之畏行潦聞道閉門空讀書十年不見今應老羌笛吹時不下來而今正合窮幽討君不聞咸平處士骨枯槁白鶴翩跹度瑤島

山居圖

野人愛山披此圖夫容秀色如匡廬莫知昔人結巢處雲松千尺今何如陰崖瀑花落飛磴冷烟石髮生雲梳仙家別自有天地迺見樓觀皆瓊瑤淋漓瀕洞元氣濕衆木一脫秋風踈石田得鏡良可鑿縛茆便約幽人居吾鄉青城千萬里山可樵而水可漁別來不覺幾更改兩鳥巢樹還愁予祇今浪跡縱萍梗仰觀瀕視空超超何當歸來老其下白日躬畊夜讀書

愛日堂為於和仲賦

於君之家臨具區躬畊把釣何勤劬爰作新堂奉親樂嬰啼拙
舞將驩娛知君綵衣常自著匪獨樂爾怡妻帑上堂朝夕具甘
旨列以羔豕兼尊鱸稱觴願親百歲壽無由駐日忘朝晡長年
樹桑陰滿戶林中衣夜巢慈烏服勞恐辱後子事盡生祥下瑞天
理符君不見東家萬厦畜有餘生兒二十不讀書崇朝街裏調
鞍馬不肯堂中問起居又不見西家有子懷明珠十年辭家遠
遊去天下豪俠相奔趨白髮之親雙眼枯令名既失身受汙於
君於君非爾徒於君於君非爾徒

贈筆生施廷用

苔苔人藝者多藝筆馮陸當年稱第一馮陸之前尚有人柯山之
徐世無匹真興朝士舊王孫憶昔被詔遊帝闈白玉堂中留補
袞馮也陸也此日其藝昏其掄玉堂仙去馮陸死遂有時名落
人耳後來溫生楊生皆擅場鄉里而今有孫子幾家有藝如有
田侯門曳裾筆滿船沈生兄弟懶歸去更有施生爭後先施生
施生良獨苦一棹江湖正風雨雪滿頭顱塵滿髯過我烟江闔
廬浦吾儕自顧非華陽奚足為爾分強良聊復臨池掃硬黃雲
烟脫手生光芒快馬追風忽當陣銛戈利劍森交張跳龍卧虎
畏顛素便欲掇出叅鍾王甫知老髯絕藝得精法差可辟易數
輩又於陸也相翱翔宣州兔越州竹慎勿貪書瘞筠簾竹已廢
萌茁兔亦飽狼腹春管秋毫取次生應待山中氣清肅作歌贈
君歸計促不足傳人喻珠玉重來過我烟江曲為君展破鷗波

綠

成都使君王季野席上次韻奉呈樽巢初菴雲林玄素
子素諸公

隱者分湖住高士雲林栖蕪葭散汀看鷗去桃花隔屋聞鷄啼
每同杖屨踏春隄詩筒酒榼前後提公子風流迺相愛縷引嬋
娟生靨韃纖歌細舞交驩從翠璫玉珮花籠葱蘭亭之下暮春
會飛觴列坐千載同莫訝眉山長帽翁高談雄辨顏酡紅頰然
自謂謫仙侶欲舉萬象超鴻濛丹丘子陶朱公人間歲月駒過
隙不飲莫待兩鬢成衰蓬君不見東風曉作梨花夢白雪飛來
已半空

贈星史汪清溪

李白有奇句汪倫多好情我無來未綏戀子得清溪名清溪在何
處白鷗長與盟日夕再扁舟卷舒一絲輕慣識魚鳥性都忘風
雨聲年二使槎到夜二天河清誰將支機石更問嚴君平列宿
二十八五緯相從衡東杓轉極垣兩眼俱分明客星到何度乃
復逢長庚遇子練初問呼我安期生我本漁者徒廿載江湖行
柁源實宵難覓馳逐天下兵昨從西川來要掣東海鯨風波猶瀕
洞海波不遑寧不見賀季真把酒聊自傾人徒咲放曠自足安
欣榮固窮豈求達但醉不用醒樂天復何疑陶公乃歸畊為子
鼓蘭柁聽我歌濯纓

畫鶴篇 為陳生介賦

伊誰畫此鶴千載遺陳生飄二有仙氣相顧移蓬瀛高吭脩脰

若長鳴磊落昂藏睥太清思凌霄漢不飛去若有待者台階平
羣真昔朝上帝所鬱羅蕭臺隔風雨鸞駮鳳馭自釣天却載瑤
笙來下土寥廓餘音世罕聞聾聵聽瞽辨徒紛紜南嶽真人旣旋
邁五色雲霞散華蓋暮聲一響闌干空人境皆非城郭在自脫
紅塵世網中直來玄圃滄洲外陳生一從魏伯陽上虞學道期
翱翔栖真笠澤瑞雲觀長對此鶴懸齊房坐讀叅同玩周易造
化機關洞探蹟乃知薛公畫向通泉辟十一通靈今絕跡故為
此鶴成愛惜孰云道士青城客久欲歸赴玉局爽但留辟間箭
一隻海塵茫二薄日色何天一方來歎識便冲碧落萬里展雪
翼圖南不使鵬先得

分題賦得任公釣臺送王允剛歸義興

任昉字彥升蕭梁時嘗為義興守

任公有釣臺陽羨西門道六朝去已遠一守稱絕倒無事每蕭
閒於焉事幽討惠政寔已多昔民仰蒼昊吳至今釣遊處水清山
亦好雲天日為旗野樹春如葆魚鳥識風流江山見文藻王孫
遠遊歸悽迷思芳草壯氣溢前修我當論懷抱出處可探竒有
志莫易老

海上丹房聯句

予與東海生俱僑練水一日汎舟自楓村塘過葫蘆灣轉桃
浦尋欲觀海抵夜色良白宿崑丘仙丹房仙好竒樂飲酒
吟咏要予二客聯句記一時遊會焉予愀然曰昔人慨光景
於鷓鴣蜉蝣者有遠遊餘響之悲今吾與子游子言殆天啓

也非耶於是二人倫屬各賦偶語共得字凡六百四十為韻
六十有四句百二十有八命篇曰海上丹房聯句仙者錢異
字公權客生阮孝思字維則予乃青城山樵虞堪牀勝也時
強圉協洽九月望日堪記

秋臯候海月夜宿丹房清堪紫氣動瓊戶白光搖素楹孝思霜凝
萬手杵火伏三足鎗異煌二豎玉井爛二連赤城堪變合鉛汞
髓交媾龍虎精孝思所以靈毓祕服之身形輕異三花常結子一
胎忽騰嬰堪後天竟不死終古真長生孝思孰云邁周聃政為凌
商彭異乾坤大莫測日月慳其行堪大椿閱春秋微蟲嘯昏明
孝思造化幾不息循環互相成異天淵一飛躍韜冶徒煎烹堪道
體詎割裂名言孰紛爭孝思超然萬象表最爾羣目盲異扶搖鯤

鵬化飲飲蠅蚋營堪疇能較巨細何用嗤辱榮孝思安期既遯世

魯連亦逃名異飛度海水弱鞭驅石染平堪完完白盤上灑二

金波傾孝思犀光微照耀怪狀畢露呈異鼈戴湧兀突鯨奔觸喧

轟堪靈鼉雜魚騰舞若惟能停孝思蜃吐起氛霧豚噴飛沫霏異

鮫呈綃錯落蚌獻珠熒晶堪一二蒼螭立雙二赤鯁走孝思何物

比日鰈况爾了頭鯉異鼈甲竟六縮鰕蛇難獨撐堪飄飄駐羽

節的礫蜚珮瑛孝思琴生躍鯉出王子跨鶴迎異龍瑄碎碣石螺

觥吸滄瀛堪放此寬大量解以無何醒孝思劃然悟忘返歸欵詠

遐征異既御鴻濛氣當作款乃声堪謫天本竒術縮地若偶抨

孝思跼踖頃步勢呼吸萬里程異坐我已机席笑子猶庭闕堪葳

蕤覆肺盖踊躍鎗心兵孝思齒鼓擊司坎音鐘叩嘈咳異婆娑髻

蕤覆肺盖踊躍鎗心兵孝思齒鼓擊司坎音鐘叩嘈咳異婆娑髻

以髮傲兀瞪而瞠堪微吟澁莊籟獨繭媧笙孝思鏤琤間金石
零霏亂璣理異鐵畫逗溜辟牙籤響風棚堪驚蛇逐毛穎飛虹
捲陶泓孝思萬卷在手破五車於腹盛異鬼谷應著策羅浮證棋
枰堪果有奕局事豈無高世情孝思室劍商鏤繡囊琴蜀錦頰異
得趣始破絕有神終合并堪蒸鑪螢煖茗金齋嬰孝思銀絲
過行鱠瑪瑙重出膜異神棗異枇杷核仙芝類莫莖堪瓜開犀落
瓠榴破珠傾櫻孝思紅擘爛於火青剖園若纓異丹分盞大橘殷
對合抱檉堪魁杓落睽蒲牢發鉉孝思駒軒總辟易猛省渾
睜曠異藥兔罷秋搗窓鷄候晨鳴堪霜結鴛頸瓦燈炮鴈足繁
煮意舞興懋起俠氣衝橫異客豪思橫發童倦嗔屢賡堪冥
搜入古羌狂歌錯鏘鏗孝思啁泣魍魎呱叫猱猩異直令東

方白畫使鬼神驚堪

虞山人詩卷之二

近體五言

鼓柁

蘭柁鼓清流獨悲江上秋
屈生常悃款漁父亦遲留
班竹涵清淚澹江沒白鷗
釣竿斯可寓隨意泊吾舟

與呂志學夜坐

坐待西齋月論過上夜春
亂離方促膝狹窄一作窄豈容身一劔
風塵際十年江海濱黃金難鑄日
白髮謬催人

送陶元庸歸吳覲母後遊越依李開府

擾二越城路搖二吳水春
自嗟淪落客又送遠遊人
扶策長憂世謀生獨為親
輸君談甍事更向鄴侯陳

送馮令之官烏程

好去烏程令間閑白髮新五弦應得趣一劍只全貧湖水家
綠桃花樹春几番兵燹地天復惠凋民

送趙生航海之京

之子天邊去遠遊滄海中蓬萊十日到雲漢一槎通夜靜應瞻
斗秋高定轉蓬慎聞堯治語歸慰釣魚翁

李士賢檢校使吳

使者來吳日多君屬後車全家當國難孤直保民餘秉節心仍
壯揚名信不虛懷忠獨憐孝珍重史官書

送相德謙之越

世路一何艱風塵戰血殷送君闔廬浦投客會稽山忘闕頭添

白尋親淚復潛臺中論前績刀馬豈容閑

寄魏秉中表兄

海上魏公子風流憶漢貂別來良契闊時節竟蕭條歲暮滄江
遠天寒白鶴遙艱難慎行處吾欲老漁樵

重寄

客厭吳江冷誰歌蜀道難風塵應阻絕歸計且盤桓臘雪明殘
夜梅花耐薄寒慙慙嗚毛穎聊以報平安

寄南潯潘隱君草堂

湖頭隱居好竹樹日蕭森對酒花當面焚香鶴在陰青山應似
舊岐路只如今潘令思吾否高情足謬吟

東倪季敏南墅隱居

季也端脩士高閒獨閉門
棗麻深晝雨鷄犬自朝暾
設以南州榻陶然北海樽
何時覓漁者相逐到桃源

寄鄧高士

海上玄真子能詩似謫仙
從來披鶴氅長上釣魚船
袖有雌雄劍囊無子母錢
一壺春自足應不問先天

寄徐生蕪東蕪愚谷上人

之子病來久緣情多苦吟
經旬不會面鎮日廢彈琴
雨過江澄練梅酸樹合陰
文殊應在座摩詰好論心

贈周可久

漂泊風塵際相逢湖水潏
繫君正哀憤而我且狂吟
禾黍感行役慕我思孝忱
憂來無復道端處和鳴琴

贈澣天鏡講師

予渡練川寓于大報國通圓寺
有大藏道場請師主席師錫
自雲間適至等謂轉大法輪
鼓鳴蝶震廣闡宗風增輝佛日
者矣我今有分得與見聞
踊躍喜懽遂成讚歎

義天本無際心鏡奪方諸
白月離滄海清風下太虛
扶宗譚般若演教契真如
龍象朝集松堂響粥魚

次席帽山人王原吉韻贈石林上人

石林峨海刹傑出大方家
說偈餅翻水看經席散花
秋聽潮信急夜坐月痕斜
借問窮源客曾來幾度槎

用唐綦毋若作留題龍興寺詩韻贈長老聞公白雲

西蜀竟忘歸東林自掩扉
百年純白髮獨著舊緇衣
閱藏心源

淨安禪鼻息微天花如雨下無着自空飛

王使君季野飛雲樓讌集

翠黛生微暈闌干下夕陽亂蛙喧鼓吹芳草滿池塘歌按黃金
縷詩傳錦繡囊焦桐誰自弄還問蔡中郎

趙生席上

清明絕過日踏雨到君家列坐新行酒比隣始種花
墻頭紅窈窕盃面綠交加歸騎寧扶醉還人插帽斜

夜雨水竹居聽彈箏

繁溜響簷牙深堂靜不譁坐來聽夜雨歌起酌春霞
燭小銀花墜箏低玉柱斜俄聞闕塞曲飄忽思如麻

旅館與陸季弘對榻

旅榻聯宵話心期一寸冰春風歆玉樹夜雨落寒燈
世事嗟餘耳人情見武陵男兒四方志搖落豈無憑

讀陳天倪處士傳有懷其子惟寅惟允

惜別經三月相思寄五言風塵淹逆旅烟樹鎖離魂
行處松楸晚吟時烏鳥昏臨文憶前行重為灑啼痕

中秋湖上看月

中天今夜月爛照五湖秋玉樹懸虛靜金波入漢流
間關南北路浩蕩一作牢落古今愁欲踏仙槎去
凌空賦遠遊

九日與鶴齋真人飲堅上人東樓次韻

樓臺超有界風月到無邊說幻難逃佛憑虛已是仙
玄洲生碧草淨土出青蓮我愛盃中物來隨社裏緣

十日對菊

撚花悲節過無酒愀無懽客裏情懷惡江頭風雨寒楊雄空識
字陶令苦辭官荆璞應難抱牙琴即罷彈

十月十七夜舟中作

江漢月輝孤舟一夜歸白沙漁聚火清露客濡衣櫓約寒潮
響鷗聯宿鴈飛人間成底夢吾獨轉忘機

湖村夜泊人家俱逃亡

歲晚過湖邊綠村夜泊船數家餘破屋幾度斷炊烟病犬驚籬
罅飢鳥叫樹顛問津無處所寒月照人眠

潯南書事

偶即潯南地川原路欲蕪老翁行乞食稚子幼還扶未放開河

卒猶差守戍夫為農那可卜愁我在江湖

澄江季炳卿留飲客邸

一勺錢溪水半年澄客心風塵增感慨山水倦登臨處群游
在林衆木森持盃騁懷思還旆聽佳音

謗興

避地葺吾拙衙門常自扁豺狼時擾風雨晝冥海上琅玕
折山中芝草零如何秉干羽不見舞虞廷

江村漁隱

微茫烟水窟窈窕野人家屋裏容書几門前著釣槎桃花春漲
漫乘樹晝陰斜欲問玄真子栖遲幾歲華

次韻沈仲說洞庭秋晚

時花媚秋色落日澹晴輝橘亞丹楓樹江分白鳥磯圍碁應遁
跡把釣或忘歸謾道因詩瘦高情深翠微

題朱叔重畫山水卷

婁東朱叔重滿卷畫雲烟過越乘山轎歸吳放野船危峰蒼鶻
上遠樹白鷗前每愜幽尋意題詩為爾傳

題陳松巢畫

秋山殊可愛畫此侶匡廬九疊青厓峻萬株紅樹踈筍輿陶令
入蓮社遠公居何日風塵靜松巢好讀書

登大覺寺琳公鑑湖樓

談咲寶樓開湖光劈面來浮雲空翳檻明鏡若為臺野鳥啣花
去潭龍作雨回坐叅真法境無意想蓬萊

題文殊院壁

文殊蘭若舊珠樹網羅交殿古餘獅座林空見鳥巢天花時作
供野菜日充庖忽憶香山語令人願結茅

昭明寺暹上人房次韻題壁

脫俗經雲壑尋僧到竹房林颯發虛籟潭影落天光淨觀禪心
寂清齋道味長南山寺相對結屋好隣傍

題暹上人可賦軒

祇樹給孤園當陽闢小軒天空澄霽月海淨浴晨暎霧隱南山
豹風傳後夜猿凭高殊可賦觀妙亦何言

遊宋胡少師橫山福壽蘭若次韻書壁

每到橫山麓都違濁世氛僧留夜聽雨我自日看雲歷二前朝

寺桓 = 給事墳淒涼莫嗟感竹帛已傳聞

留題橫塘般若寺

西郭橫塘寺開門對越溪潮生滄海近雲起碧山低浮世驚前
夢迴廊覓舊題重懷先太史曾共白雲栖

昔先太史與白雲閒上人憇此今三十年矣而僻間
遺墨尚新仰瞻徘徊不勝流涕因賦此以識歲月云

王明仲聽雨樓賦

華星不可摘飛雨若為聽忽瞑翻巴峽兼秋響洞庭甲兵連夜
洗絲竹暫時停幾度銷銀燭沈思賦宵冥

南城祚真精舍寓宿呈希哲二公

塵世竟忘情還來訪惠明一燈懸夜榻萬竹起秋聲虎嘯風連
屋烏啼月滿城坐忘渾不昧相對話無生

宿堅公房詠高麗石琉璃

石燈如仰月雲截水光寒不為山靈祕應從海若刊中虛長寂
照表淨即空觀絕勝青藜杖寡 = 伴夜闌

白雲為閒上人賦用鄭子封先生韻

一片復一片應無去住蹤悠揚輕似羽變幻儵猶龍寶月同瞻
海青蓮別見峰若招巖畔宿飛散下堂鐘

對雪

碧落瑤花滿今明屬化工江山如畫裏天地只壺中瑞應三番
白春無半點紅原頭踏芳草遮莫待東風

山居次韻六首用起白題

山居何所有簷竇過晴雲靈物循常見塵囂絕不聞花開蜂作

陣松逕鹿成羣莫怪尋幽約長來避俗紛
龍山宛若龍飛舞出羣峰霖雨終須作閑雲或可從蕭條何處
寺隱約數聲鐘儵幻聽經去天花雨九重
雜樹帶雲栽林間一逕開好鶯鳴不絕獨鶴去還來密蔭生青
靄閑花落紫苔為吟清晝寂操几數徘徊
勝絕為人誇山中宰相家琅玕皆翡翠金彈是枇杷玄圃生竒
玉丹爐養嫩芽孰知方外事不比世間奢
乳燕定新巢翻過柳梢自來簾幙下不墮網羅交細雨迷南
陌飛花接近郊主家貧好在破屋任人嘲
好山看不盡一望一番登岨險森如戟泉甘冷若冰鳴鐘傳下
界著屐上高層不是石橋客何由識老僧

送周伯昂兵革後歸義興

城郭已皆非人烟觸處稀莫言前度事但得一身歸妻子全當
喜鄉隣在可依孝侯還有廟再拜勿歔歔

飛雲樓春夜會飲聯句

樓外雨蕭騷如何慰寂寥在畫闌昏正倚朱履夜從招公子開
東閣敏先生莫後邀能徵協呂望鳧舄佇王喬堪自尚虞卿壁
誰吹伍子簫玉壺承酒酌在銀葉藉香燒盞襟懷豁飄氣
宇驕敏過秦人罕論識趙客難撩文脉如泉湧堪詞源若海潮
每歌青玉案長想赤闌橋在就醉翻金縷相期折翠條烟霞同
嘯傲敏汗漫及漁樵酒勝春衫薄詩成蠟燭銷堪悠揚通蝶夢
瘦損過蜂腰最喜相隣近在惟憐失路遥幸因投契誼何以荅

瓊瑤敏瑟。低簪溜具。動斗杓結歡。得知已端不負春宵堪。

絕句

滄波

滄波眇碧落。蘆葉生秋風。一船不結纜。長嘯月明中。

舊箏

鴈逐暮雲斷。蟬驚秋夢寒。蕭條閑塞曲。不復和愁彈。

詠異石

吳人朱叔重善繪畫。嘗遊石堰山。遇方士授異石。玉色清潤如鑑。如屏。雲白山青。趣若天造。要予詠之。

觀山有竒術。指此天地根。白雲飛不去。一片玉渾淪。

寓目

天遠水復遙。白鳥獨長往。常從息機人。發此天際想。

海岬圖

海岸水西流。看山正倚樓。迢迢烟九點。咲指是齊州。

題醉李太白圖

汗漫魚龍窟。逍遙虎豹關。死生渾託醉。何獨夜即還。

題列子乘風便面

昔者列禦寇。冷然御其風。方諸徹秋水。乃今見猶龍。

題青山白雲四首

幽人卧春曉。四山雲氣迷。閉門花任落。叫殺護林鷄。

人家青樹合。僧寺白雲封。誰共詩翁坐。夕陽聽晚鐘。

我愛山中住。山中秋復春。白雲長卷戶。來往斷無人。

一作獨樵人

宵二一帶山沉三萬株樹著我靜者心獨得看雲趣
題柯叅書竹

秋風來蒼梧白月下九疑不見湘夫人一枝空淚垂
海上青琅玕曾持天上看蕭條風雨夜誰拾鳳毛寒
題倪元鎮竹樹

个二竹弄雨了三樹撐烟還教來拜石癡絕伴清妍
題顧定之畫出墻竹

莫咲虎頭癡偏憐鳳尾垂粉墻遮不斷翠雨濕多時
題朱叔仲所畫青山白雲橫幅

山青綠樹深白雲更多少憶爾越中行揚帆看春曉
題陸季弘畫碧桃花

別是一枝春飄然似玉人東風仍滿面絕不染紅塵
題章橫塘畫護花

宜男爛著花不似王孫草莫引蝶空狂翻令惜春老
題舍弟坊畫竹

吾弟頗灑落鳳梢蕪寫秋看渠矜老可憐我憶陵州
戲為日本僧題梅花

飛去三千里開過幾劫春此言誰解得還汝日東人
為立上人題雲山欲雨卷

白雲不作雨作雨但霏微長罨青山路唯教翠濕衣
題陳慎獨畫

菜竹在坡陀蕪葭隔洲渚咫尺雨中秋披圖謾愁予

美人撲蝶圖 所持扇上有萱草花

雙蝶忽飛來撲之意偏好繡扇著春堤恐污宜男草

六言

吳江

三高祠前流水五湖烟外孤篷楓落吳江夜冷高情都付漁翁

靈巖寺

響屨迴廊何處來尋陳迹都非日暮疎鐘孤起白雲巖下僧歸

姑胥山

不見舊時臺榭空聞千古風流滿地山花落去幾番麋鹿來遊

橫塘

越來溪頭暮雨姑蘇城外橫塘黃帽就船炊飯綠鬟隔岸鳴榔

盤門

南兩廟前霜柏闔廬城下寒潮風雨扁舟經過傷心無復吹簫

石湖舊苑

望湖亭子淒然不似當年風景畫船空載梅花誰唱暗香疎影

題畫小景

綠水金塘馬健青山紅樹鳥鳴策杖吟鞭遠指濛濛花雨新晴

題巖壑孤舟圖

我將投棲巖壑愛此松蘿絕塵欲喚滄洲艇子不知黃襖何人

題朱澤民書釣圖

汎輕舸兮釣渚歌滄浪兮自取不知所讀何書竟相忘於魚水

題顧定之二篠

匪闡斐之老稚伊飛翻之羽翹戾九天之披拂遲一氣之扶搖

虞山人詩卷之三

近體七言

汗漫遊與姚子靜錢公權辟上人同賦

我亦身後汗漫遊逍遙海上覓玄洲徧探龍藏三千界一駐鸞
笙五百秋不用靈槎通絕域底須神駿蹴崑丘臭帑即是人間
世誰共浮游樂未休

吳伯常家看桃花

二月一日走海涯吳生邀我看桃花重尋玄都定何日且看赤
城俱是霞此番開顏阿母喜他年得子小兒誇蜂衙蝶陣渾擾
二何處春來有汝家

山家看花

折得山前數樣花瓦餅隨意貯山家一作亂揀香霑昨夜三更
雨紅帶朝陽五色霞不用熏籠蒙獸錦絕勝肌玉護蟬紗長安
道上風塵暗把酒看春復歎嗟

震澤

汪洋巨澤控三吳不為黃池入版圖大禹功成遺鼎在夫差後
極故臺無淵靈尚護龍潛窟國色纔銷鹿卧蕪神物在川輝日
月生民終古樂涵煦

拜郊臺

臺遺趾在越來溪上

吳王城外拜郊臺山色湖光共繞迴終古翠華隨水去何年玉
牒為天開斜陽一笛牛羊下細雨千帆雲鳥來忠死佞存墮霸
業登臨不盡客興哀

望湖亭

望湖亭子橫山半水色山光落檻前二輩風流今已矣野人登
眺獨悽然鶴鳴華表誰同聽犬上東門莫自牽謾把一杯消客
恨五湖何事別乘船

闔廬浦

闔廬浦口畫船開興逐秋湖海上回霜樹露花紅窈窕梵宮仙
觀碧崖嵬南飛越鳥雙二過北帶吳山隱二來欲把一盃觀浩
蕩乘風檣舵苦相催

陳湖

渺二洪流接具區由來畊鑿搃膏腴沉淪為有魚龍混開廓豈
無鴻鴈俱好覓根源隨博望莫將清淺問麻姑桑田變海元如

此自汎扁舟入五湖

嘉興水西寺

宣城水西不可到秀州水西今獨遊太白才情真放逸牧之人
物更風流諸天問法元無相千載題詩在上頭人世古今同一
夢劫灰烟暝五湖秋

山家書壁

為愛山家人跡稀住來渾覺市廛非雷鳴谷裏朝尋菌雨過巖
前且採薇草澤底須人自棄桃源真與世相違他年未必無園
綺應是看雲到晚歸

山家書壁遺老農

老農政喜黃梅雨笑我何妨白晝眠竹逕鳥啼泥滑二稻畦蛙
叫鼓闐二開溝放水將鋤去過嶺看雲借屐穿性僻自嫌多懶
散空吟未遂卜居篇

登穹窿山訪張表二道士

穹窿絕頂訪仙居燕坐高人石不如一點紅爐飛白雪大千碧
海掣金魚坐看日月渾淪轉笑指華夷寡廓虛我亦飄二生羽
翰不奔塵世五侯車

書陶孝子傳後

常州城陷民陶某父為賊驅去及官軍復克城父死不知其
所某於寓近營冢壙葬父冠裳旦暮哭臨故人序其孝云
天兵自昔下宋時常州之民皆死之百年政爾勞生息一日猶
然逢亂離妖氛易滅不足數玉石俱焚良可悲北門陶家有新

塚子孝親寃難汝為

旅懷

野閣篝燈獨夜時
苦愁風雨失歸期
夢回蜀道關山險
行盡江南草木衰
縱酒為憐花落去
懶眠重恨月來遲
不知鳴鳳飛何處
老却梧桐第一枝

春興

十日寒風剪落梅
東西撩亂雪盈堆
王孫何處尋芳草
野老多情立舊苔
頻覺繁華隨水去
斷無行跡過橋來
黃昏寂寞徘徊久
安得清樽為爾開

謗興

眼中風景非前日
門外桑田是幾年
北去黃河猶滾滾
南飛烏鵲自翩翩
于今虎帳聞鼙鼓
何處龍舟奏管弦
濁酒一盃難強醉
默看芳草憶春前

聽朱秉中鼓琴

潮落滄江月上時
衡門獨客正栖遲
彈琴猶有愁中散
對榻可無鍾子期
蝴蝶翩翩迷曉夢
松風颯颯起秋思
水雲別轉瀟湘曲
白露無聲下竹枝

八月十五夜對月寫懷

月色且看今夜好
砧聲不斷若為情
聯綿烽火近或遠
阻絕兵戈縱復橫
赤壁烟消非昨夢
黃河天近幾時清
如今搖落重寥廓
落華髮催人兩鬢生

中秋夜與堅上人看月

圓通寺裏看秋月十五潮頭送夜明
龍喜金光搖海藏鵲驚樹影弄天泓
祇知世界無昏昧不信風雲有變更
詩句已成禪即悟急聽樓上打鐘聲

江渚移居

柴閔臨水野人居思滿滄洲老釣漁
落木兩山秋色遠淡烟孤鳥曉晴初
底非江左袁宏渚可是隆中葛亮廬
故舊幾人同笑傲兵塵十載謗躊躇

山中獨夜有懷江上故人

三更風露翻衾薄萬壑松濤到枕繁
江上故人寧隱豹山中獨客正聽猿
蘭烟賸馥烏皮几燭影搖紅白玉樽
月色灘聲誰寂寞思君清氣滿乾坤

漁船早起次韻

舟泊蘆花雪滿窓曉鐘烟寺已微撞
鷄啼草屋星垂地鴉散楓林月墮江
拙計祇甘持釣去閑心何必豎旛降
起來驚破沙鷗夢飛度前汀又一雙

雨中過同州訪王性中齋居寓宿話舊

天時人事底推遷一別俄經二十年
華屋幾空玄鳥計滄江重對白鷗眠
前程擾三义路往事滔百道川共話
平生夜來雨故人高榻未虛懸

午日訪沈元圭席上次黃舜臣所賦詩韻

一簾葵錦爛晴霞五色絲虹暎
紗玄藥自消頭上雪絳榴誰插
髮邊花茶煮石鼎從施禁詩寫蠻
牋學破邪不是西山黃石

叟難尋東老地仙家

宿黎里普濟院書壁懷南邦長老

空花室裏聽清秋身世俱忘得自由
風雨蕭條來北竇
簑葭瑟縮響南洲
瞿曇喻法開金像
禪衲當機豎玉樓
却話西余山下客
在川何不棹歸舟

重宿金處士瞻雲軒呈二同遊

昔同下榻軒中眠
此夕復來驚五年
世故恍然如夢寐
物華端可喻雲烟
兩公何憂髮俱白
唯我自笑心無緣
但看梅花顏色好
歲寒仍與月娟娟

施宜之處士隱雅宜山守先人塋與其先隴為隣承寄

柳道傳太常所撰其墓銘見示因詩奉酬

雅宜山在玉遮東
聯絡諸峰眺望中
壹自佳城封馬鬣
長時神氣接鴻濛
穹碑述德金門彥
高隱承家白髮翁
我亦欲歸從杖履
共誦擊壤樂淳風

送馬民立之杭州

泛泛相逢水面萍
悠悠行路尚縱橫
殘年送子東南去
頃刻題詩感慨生
西子湖邊春定早
謝家池上雪初晴
登臨莫折垂楊柳
試聽黃鸝第一聲

送張士舉歸閩中

闔廬城外草芊芊
西子湖邊客上船
二月水生春自泛
三山日落夢相牽
鷓鴣竟去滄溟遠
杜宇還啼錦樹妍
我亦欲歸愁劍閣
風塵消息在何年

送張伯奇還花溪草堂

見說石田茅屋在花溪南畔柳溪東
亂兵橫殺雖不到死草華風亦自同
天際淺蕪春莽蒼水邊寒月夜朦朧
羨君歸去償高卧布穀還啼幽竹叢

送朱秉中之杭州將歸天台山中

盈二柳色動江臯手挽長條照錦袍
亂世摠懷鄉土計還家寧憚路程勞
桃花流水心何競華頂尖峰首謾搔
竊莫西湖戀光景槎回南斗滯秋高

送馬民立省親後還官越上

撫戎之越豈能羈拜母還官定有期
屈賈有才當用日儀秦多辨政逢時
潮平江閣曹娥廟木落山空夏禹祠
政隙好探風土

勝莫將孤劍倚天涯

送潘公頴還越上將葬乃父子素翁

離亂相逢淚滿襟恍如鬼夢話侵尋
猶愁大澤鯨波險况說南山豹霧深
楊柳折來重忍別蓼莪書罷復難吟
隴頭還植新松樹知向棲霞第幾岑

重贈

烟塵眯目柰愁何柳色寒深臘未過
把酒送君離思遠揚帆過浦亂山多
到家立雪看脩竹涕泣臨風廢蓼莪
我苦解栖霞踐霜露年三湖水綠生波

送魚臺賈景花自吳航海之京師

鼓枻滄浪歌濯纓送君臨別重怔營
逃名遂是魯連子痛哭安

非阮步兵襖褐文章千里重白鷗滄海一舟輕好紆長策于明
主正為蒼生問賈生

送顧仲贄四明歸覲

木落空江烟霧開客程無柰鴈聲催船從賀監湖頭過人在吳
王城裏回梵刹雨花霏雪竇海潮浴日上蓬萊靈椿此日應千
歲好著斑衣獻壽杯

送瀚北海上人住靈巖寺

昔到吳王避暑宮靈巖寺在半天中霸圖終入黃池會山勢猶
紆紺宇雄一去豪華千古夢數聲啼鳥百花風高人好在琴臺
上海月傳心向碧空

次危大叅韻送相德謙之台州別駕

一上滄溟萬里船便朝金闕九重天遠臣艱棘曾身踐聖主哀
憐有旨傳別駕之官台宿近長安舉首日華邊故人珍重文章
在報政行看不負賢

送楊方外法師之上清山覲乃師祝洞天真人

長年海上賦遊仙又送楊君覓洞天華蓋自來塵世表祝融猶
在望一作日華邊先生遂赴渾淪約弟子重叅橐籥玄蘿磴夜深
捫絕頂素華臺上月當圓

贈黃山人

接浙重趺四十年眼空歷歷好山川來龍起伏成形侶大塊渾
淪豈變遷路遶脚根千里健瀾翻舌底九河懸把詩長嘯出門
去又踏春風何處船

書贈錢公權

今年海上逢錢起日三題詩句法新謂我欲高東漢士多君恰
到盛唐人扁舟共泛心相得高榻長懸意獨真唯待吹噓上天
去不知何地有通津

贈日本僧立恒中藏主

上人昔自日邊來大海猶如渡一盃三萬里程空水觀百千沙
界到天台繙經席上花飛徧曳履林間葉落堆政共長吟好詩
句却言又上鳳凰臺

旅贈王宗善

江湖獨客轉飄蓬一雨愁兼半月風正哭窮途如阮籍忽逢佳
士即王戎故園春去無多燕此日南飛幾箇鴻甚喜得君相慰

藉深慚花落酒樽空

鄉老蔡霞外尊師見過感懷書贈

西來文物眼中稀歲晚相逢款竹扉萬里祇操鄉國語百年惟
著野人衣翠蛾江上愁空老白鶴遼東信未歸見說閔山塵霧
暗不知城郭是耶非

贈单子貞遊雲間併柬知仲義

月過衙門竹樹低清樽聊得話羈栖翰君慣聽雲間鶴笑我空
聞夜半鷄千古好懷渾謬憶百年高興屬誰題東南久別知微
士歲晚尋船逆上溪

贈湖州二沈筆生因簡潘隱君

沈郎兄弟茗溪客藝出蒙恬入品流十載舊遊渾似夢一番相

見又逢秋扁舟夜雨來滄海滿目風塵易白頭歸去定尋潘處
士為言無事狎羣鷗

茅經歷之嘉興道過野寓因贈

省郎南郡之官去百里豈驚行路難不謂野人踈世務謬勞舟
楫艤江干沙汀寂寞浮鷗冷城郭蕭條勁草寒自古循良須贊
畫好垂竹帛向人看

訪潘公穎南潯隱居

去歲途逢歲欲徂今年歲晚訪潯隅頭顱未老心先折世路多
艱事屢殊知子淮南思桂樹愁予劍北問桑株閒情廿載渾依
舊却笑虞翻走畏途

寄黃高士鶴巢

五年不見黃高士孝行如君豈得之阮籍再生應有愧顏丁不
死即同辭瀧岡表裏曾潛涕陟屺詩成重所思莫怪剡溪船不
到石尤風阻未堪期

寄馬民立在越上并簡孟季成

半生書劍各飄零千里相思望窅冥春水鷗邊吳樹綠夕陽馬
上越山青依劉已是同王粲適度何由侶管寧故舊見君還問
我釣船只說寄烟汀

寄徐生

積雨新晴三月初好風輕颺落花踈闔廬浦上安漁艇攜李城
邊問客居吏牘可閒還復爾親庭常省近何如一春未得南來
信綠樹陰時想過予

寄澱湖鄧高士

故人消息近何如一別經年未得書世事似棋猶自奕湖光如
澱不妨漁風塵定阻王喬鳥山野或容陶令居我亦從來絕泥
滓何緣方外學清虛

寄王明仲寓杭

南風畫舸去十日北海清樽空百盃黃鳥有時啼綠樹明仲宅西柳陰
與僕寓所門巷相接每歲五月有兩鶯來鳴嘗相謂曰紅榴和
信禽也自明仲出鶯果至日鳴不輟故及以報之
雨落蒼苔嘗以盆榴見遺故云已聞相府朝：入却喜仙都夜：回山色
湖光固無恙浙船應是未歸來

題王生畫春山圖

山中幽事夢不盡愛我王生每畫之春及把犁畊綠野晚來携
甕汲清漪桃花汎處漁舟宿藤刺長時鳥道危四十漂淪歸計
拙一看一畫一題詩

為義興周伯昂題春山圖

孝侯孫子獨稱賢亂竄思歸夜不眠看畫每期王古轄題詩惟
憶杜樊川桃花兩外尋樵徑春水天邊覓釣船愛汝披圖良足
慰不須重辦買山錢

題王叔明所畫巖居羅漢

金錫曾飛海上峰歸來巖窟坐蒙茸已探娑竭珠宮藏幾度長
安半夜鐘席上嚼花馴雜鳥鉢中聽法隱黃龍黃作寫真畫變
還摩詰應為人間歎未逢

月夜汎湖

醉裏誰吹碧玉簫滿湖明月汎蘭橈一時高興都難遏萬里青
冥便欲飄風水龍吟秋嫋：星河鷺起夜迢：漢槎羸節成何
侶不及空哥度沈寥

寄題湖州沈自誠竹水居

水竹之居清且幽林文無恙在湖州淵魚或躍誰同詠鳴鳳安
棲不易求鎮日輸君常把釣何年著我一維舟共燒蠟燭聽春
雨高卧清風八詠樓

書畊隱卷後

吳下顧家兄弟賢養親遺子力畊田暖雲穀雨春千畝斜月犁
星曉一川塵市不逢真隱者桃源忽見即神仙年：但願長豐
稔無吏徵租橫索錢

題季丙卿見示前輩陸子方先生義齋廉使所著乃伯
父季吉甫傳并詩卷後

季父醫名播昔年寸心行義契蒼天如扶槁朽顛厓裏盡起春
風造物前廬扁神竒端復並機雲文字固當傳至今遺澤流諸
子猶似澄江注百川

丙卿還鄉里賣藥躬畊予喜而賦詩為別

季卿為醫世無雙十載挈家遊此邦逢人賣藥不二價教子讀
書同一窓我昔長嘯綺里季而今歸學鹿門龐明年何處聽春
雨杏花如錦照澄江

題贈筆生王純與徑山愚菴及公同賦

三郎縛筆住湖州翰墨場中得縱游心力盡於初畫妙眼睛全

正一毫頭青春好樹流鶯轉白月空山老兔愁直到玉堂揮翰
手新翻落墨為渠優

寄題先月樓

海上陳郎百尺樓月來先得水天秋為憑碧落無塵界故見滄
溟徹夜流兔魄一生通汗漫蟾光繞露作神遊何時去倚危闌
曲更為題詩在上頭

夢綵堂

余士平提李豐城人寓京師二十年以兵阻
未遂還鄉思親不少置故其堂扁曰夢綵

高堂白髮不勝簪尚有天涯遊子吟老萊斑衣每入夢春暉寸
草難為心萬里關山阻南國五色鳳凰鳴上林東風幾度桐江
綠蝴蝶飛來春已深

野人家

野人還住野人家好在山顛與水涯不以紅塵干世事却於青
草識年華門前夜雨生新漲屋上春風捲落花只有漁樵來會
酒謳呼每到月西斜

看帆四首

襄陽丘彥章僑居笠澤數年闢小軒與搖城江直風帆沙鳥
如在几席間余嘗為扁曰看帆而為之記今從海上還重過
軒中留住屢日乃相與徘徊間關而鄉情客思共有感焉故
復賦之以詩

烟波江上使人愁

用唐人崔顥
黃鶴樓語

贏得開軒作卧遊底事千帆來

嫺：復同孤鳥去悠

遲

回星斗寧攬落快沓風雲不暫留瞬

息安危由逆順轉看身世亦同謀

蚤覺浮生類轉蓬江湖元不限西東十年斂跡居林下萬里遊
情付夢中開闔豈嫌梅子雨往來難信石尤風青山坐老堆黃
髮奈爾滔二泣路窮

一日幾番雲作陣百年都若螳旋堆南金逐翠登燕埒北厠隨
貂到楚臺採藥已將童女去浣紗曾送美人來名奔利後何休
歌日落長天數去回

經過灩澦汎瞿唐天險何如地險長我愛越山投剡曲君看吳
水憶襄陽季鷹思鱸乘高興司馬探書念遠鄉不是烟塵迷錦
里也還鷗燕逐牙樁

題吳江孫氏小隱湖樓

太湖三萬六千頃小樓尋常盈丈間高情自寄烟水闊長嘯不
驚鷗鷺閑白日看雲當檻過清宵放月照琴還誰家燕子空繚
繞惟待秋風墜綠鬟

心遠樓為瀚上人賦併發同席鄭明府一笑

東吳勝地黃山麓北海上人心遠樓閑愛白雲飛海嶠靜聽春
雨過滄洲復公詩好不可罄鄭老官餘曾共遊薺滑筍肥加晚
飯得參世外有揚州

雪篷軒為式上人賦

大方式上人嘗遊雲間汎舟觀海晝夜跏坐篷窓之下而
心解神會所謂冰厓鐵樹造證有獨得之者非世之人所
可識其樂而樂也及歸隱靈巖山中縛茹為脩定之所因

自扁曰雪蓬軒蓋將志夫不忘其所得之從來耳新公仲
銘廼為文以記其事龍華樵過之因賦詩資一笑云闕逢
執徐浴佛日

憶棹扁舟渡海東海風吹雪灑寒蓬恍如屋裏生虛白誰共無
邊說幻空暫對鷗盟忘綠渚更探龍藏入珠宮而今別在青巖
半戲玩雲泉去住同

如舟亭為沈子和氏賦松雪翁所書扁

東老作亭東海頭開窓盤礴坐如舟花飛酒幔雲高捲竹映書
籤水亂流留客可看清剡雪學仙應過洞庭秋只從占得鷗波
淥却笑王孫賦遠遊

安素處士疇隱次鄭遂昌韻

滄海揚塵瀕洞時荒二白日閃朱旗田間勿怪小結屋世上更
誰能採芝烟雨荒村歸牧豎風波極浦見漁師清晨出畊晚入
息三尺黃魚足辦炊

新歲次韻沈存齋

滿卜今年見小康莫疑筮短復龜長野鷗久識滄洲趣海鶴終
期寥廓翔日轉華夷蟠淑氣春回草樹發天香先生自種門前
柳已伴新鷺與酒黃

次韻朱北窓阻雨留江館對榻

落花如海亂西東綠水青山舊日同無奈春光容易晚不知行
路幾時通竹深野鳥頻呼雨浪滾江豚正轉風苦欲留君休解
纜剪燈聯榻話飄蓬

次韻荅甬東方彥脩見寄并柬徐生

避地每承先枉問躬畊無計服勤劬兵戈南北家千里風雨兼葭海一隅故舊豈聞真國士笑談唯愛老漁夫煩君為覓蓬萊路徐福樓船近有無

次韻陸高士見寄

美人相別意何長世路悠々曲侶腸軍馬野中猶格鬪漁船江上亦淒涼連年甬里同茶竈何日成都問草堂惆悵沙鷗隨所適東飄西泊侶無鄉

次韻荅阮維則

蹇予十載漂淪客奈此一春風雨何泥沒畏塗人跡斷草披荒屋漏痕多長懷鳥道行々險却著騾綱事々馱萬里窮愁逢阮

籍竹林雖近未能過

次韻奉荅王性中

華館春風昔往來翻成車鞅逐塵埃狂遊自訝飛龍劍落魄渾忘化鷓盃天地一漚身未老閩河萬里路還開欲將短笛吹佳調又惜江城玉樹梅九斗羣峰飛翠寒仙人居處最高安每看直下滄溟小長立危尖宇宙寬壹自兩鳧從遠邁數番雙鯉奉餘懽而今帶月吹笙去海晏塵清更不難

餞公權席上次韻

捲地東風暗落花倚風聊側帽簷紗十分春事都成夢半百年華只謾嗒詩酒縱憑知己誚才情渾好著誰誇考功宅畔潮通

海便欲乘桴莫問家

次韻荅公權見貽之句

一自風塵瀕洞時百年身世轉堪悲豈無懷抱同千古誰共登
臨望八垂為客謬投鸚鵡賦傷春多在杜鵑詩窮途覆轍遲徊
久莫道為輪不用規

次韻海上還

問君何處覓玄洲還作東方海上遊瑤草只從方士寄蟠桃那
許世人謀塵飛恍惚千年劫槎轉虛空八月秋但怪晨光多變
見元龍不是蜃為樓

呂彥貞以詩見寄江舍次韻奉荅二首

失笑自甘成野老放歌猶復哀王孫十年兵阻西蜀道九月霜

雨東吳門缺裂布袍懶適市蕭條菱舍還依村何緣處無酒
賣故人數來空與論

白石先生多逸情寄來好句加彌明空江落木秋正下流水行
雲日自生神人忽張洞庭樂老將復捷燕山兵雄深雅健何可
得我一把詠身如輕

次韻堅上人秋懷

曾策羸驂笑獨蹇秋風瑟縮楚南天好詩都拾奚囊裏得句頻
過佛寺前坐傲浮雲棲亂葉生憎急管雜繁絃而今頭白心如
水惟有愁情到極邊

用先叔祖韻壽薛鶴齋真人

近以兵避海上會鶴齋真人于練川語及舊遊皆如夢寐因

誦先叔祖太史文靖公詩乃為真人九月一日生朝賦也今
俱客於此復逢此日而誦此詩感懷今昔三十年矣於是堪
不敢無述謹用韻以為壽云

練海秋潮若捲濤遼天得與鶴同遊人間不老三花樹天上初
分五色桃甲子每書聊自記姓名千載復誰逃等閑談笑重陽
近又向樽前一舉螯

薛毅夫

青城文思涌波濤子復長吟海上遨瞻望白雲歌伐木記從
瑤水得餘桃百年風雅誰能繼萬里烟塵共此逃不是菊花
知節序一杯負却解雙螯

答陳孟章省元

文章得失寸心知千載寥寥竟屬誰天象昭回雲漢表人文宣
朗古今宜鳳鳴阿閣雄諸籟蟬響悲風引一絲之子有才良得
意閑睢麟筆玩多時

陳憲

幾年白髮欲成堆千里青雲未有媒高論謝顏思雅變遠懷
班馬識竒才六朝音響都成選兩漢文章孰可回想是寸心
知得失相逢為我洗煩埃

悼堅上人

幾度扁舟過練川上人邀我佛樓前聽潮倚柱秋聯句待月鈎
簾夜說禪身世等空前日夢影堂虛設故時筵如何却說心頭
事丹結三生石上緣此師之遺語故用為落句

讀饒介之遺徐允中書

介之善張旭懷素書妙一時人往爭得之以為奇玩其得意超邁之筆而徐所蓄尤多故乃裝輯成卷眎若名言世珎然皆務誇張矜滿之辭略無一語能及國及民如云當年僕過吳陵時知有諸豪傑今日乃得為刎頸交何也以氣相感爾又云允中人傑肯與僕領此夙志矣噫觀夫此得不為果亡必敗之讖耶今此卷散落民間使人一展覽便不殊滿揮毫草入狂顛歲月猶題破國前郭隗不言才湯爾田單失計事徒然穴中虎子終探物夢裏麟兒底詫賢總為有生鍾禍讖絕憐無處託樓船

施架閣池上夜飲聯句 潘公穎明發將歸南潯

槽頭醪醕倒不盡池上梅花開欲齊今夕好懷良足慰穀百年
高興若為題銀燈絢席珊瑚爛敏綵筆聯詩錦繡迷細雨作花
簷際落堪清歌如縷拍中低渾忘司馬青衫濕穀侶聽官鶯綠
樹啼公子金猊燒篤耨敏美人犀筋勸馳蹄也知北海能豪傑
堪况有東方善滑稽腰細舞低翻弱柳穀手纖盃重壓柔荑先
判五夜同傾倒敏未信三邊尚鼓鞞倏忽年華梁旦暮堪風流
人物晉東西江湖空闊鴻偏到穀梧竹高低鳳獨栖乘興放船
來笠澤敏散愁投轄憶潯溪襟期久矣交如漆堪笑謔頽然醉
侶泥潮漲空灘移舴艋穀雨晴何處看鳧鷖會須發達攄憂憤
敏慎勿登臨動慘悽失喜今宵是何夕酒闌起舞忽聞鷄堪

絕句

西蜀二首

西蜀青山青似眉連雲芳樹杜鵑飛壚頭酒熟櫻桃過萬里橋
西人未歸

春風畫舸錦江上細雨朱櫻紅樹中買得白魚贖沽酒丈人相
對倒椰筒

玉壘詞

玉壘峰頭月落西碧鷄祠下杜鵑啼江南倦客多歸思憶踏扁
舟汎五溪

三峽詞

雪浪西來常滾滾雲濤東去自茫茫寧知萬壘關山恨比似難
牽百丈長

錦官

錦官城外山如畫春雨飛花紅滿川人過舊壚還問酒魚來丙
穴不論錢

宮詞

想鳳停針刺繡紋沉別殿鎖重門棠梨枝上三更月雪色冰
輪不見痕

有所思

美人不來眇何許路傍芳草綠萋萋桃花春浪半篙淺恨隔三
千弱水西

謗興四首

除夜

出門無路達天衢謗擁寒衾吐書歲月又隨更漏盡半生孤憤不能除

元日

帝所新正盡早朝萬方無乃寸心勞野人空老江湖表夢繞鈞天日已高

人日

草堂人日倚吟筇日出陰消見遠峰但願八荒春盎盡無爭闔即為農

元夜

鼇山月在滄江冷蛟室潮生貝闕寒閑却錦囊雙鳳瑄玉人何許夜漫

春日漫興六首

甫里祠前春雨晴闔廬浦口海潮生白鷗聚處蒲芽短驚起輕盪槳鳴

幾陣飛花撲高樹一聲啼鳥正當門閒拈綵筆無題處寫得江南過雨痕

夕陽半落烏衣巷春樹都迷綠野堂無事山樵雖不出也愁風雨暗高岡

去年一得河邊信萬戶千門掩糞泥

逃亡之家皆以糞土封門

不覺風烟慘

江上也無豚柵與鷄栖

桑條齊綠柳毯又見人家卜養蠶到處落花隨雨後半分春

巴在江南

西塞山邊吹戰塵南陽原上草如茵誰將宋玉傷春句說向登
臨感慨人

早春述懷

河邊殘雪未全銷怪底春來暖尚遙好待東風剪芳草馬蹄踏
遍赤闌橋

花下把酒

一百五日正欲莫三月盡頭猶是春把酒對花須大醉人間誰
主復誰賓

春興二首

詹尹如何為卜休閒身猶住海邊樓一春風雨知多少花落鶯
啼併作愁

原頭芳草綠如茵寒食江南已過春飛絮漫天兼遶路落花如
海倍愁人

吳下口占

吳王城下水連村梅雨新晴海霧昏誰復吹簫市朝變夕陽芳
草斷人魂

越來溪

每踏扁舟過越來青山何處復登臺野花荆棘都迷恨空逐寒
沙白鳥回

過王季野妻施夫人墓因懷季野

寶玦珠奩土一坏東風原上使人愁落花寂寂迷芳草日暮王
孫何處遊

昇公蘭若

莫笑長來過虎溪
逃禪喫酒醉如泥
桃花落處看春色
楊柳陰中聽鳥啼

登天池山發在公一笑

行窮水色與山光
覓得靈源到上方
躡斷翠厓雲漢上
坐捫參井濯滄浪

為在公賦石屋

石屋都無斧鑿痕
指來元是一渾淪
借師猊座盤礴處
嬴開出維摩不二門

題渾淪菴

龍虎山中看月高
靜無天籟絕纖毫
渾淪消息誰知得
夜半吹

笙醉碧桃

寄湖州潘公頴

看花長想曲江春
燕子東風聚散頻
君向水精宮裏住
題詩還近玉堂人

寄王明仲

西湖何處好題詩
落日西泠唱竹枝
團扇晚停眉黛斂
水寒休弄玉參差

贈筆生溫子敬

銛鋒淬鏑未由降
夢底生花愧老江
要見太平無事日
殺青書裏作長扛

贈墨客李慶源

千金買賦不買墨，重萬金識者稀。
卿操絕藝待良史，著弊江南舊布衣。

送達明善還嘉興

鱸魚膾斫樽無醪，阿濫堆成笛正愁。
昨夜涼風吹得苦，莫傳離思入南州。

遺陳生

流螢羅扇夜徘徊，望斷銀河鵲未來。
何處海門潮送月，幾年空照越王臺。

讀何水部詩集

剪燭聯詩孰似君，多情無奈沈休文。
揚州春月應無夜，祇為梅花瘦幾分。

示陳起

故人遣我作仙遊，世上應無百尺樓。
一見鳳毛翬五彩，尚思談笑說吳鉤。

留客聽琴

樓中伯也興不淺，座上中郎心欲歸。
曉蝶幾番和夢去，秋鴻逐段拍波飛。

遺陳童子

涌金門外秋如海，笑指青天白玉盤。
此地別來添兩歲，姮娥還怯夜潮寒。

荅鄭長卿見寄

滄江梅子雨絲絲，谷口書來念遠期。
愛道不官耕隱去，但悲風

木起哀思

為弘行者畫萱草

弘兄身在空花室夢幻無邊苦憶親要認東風真面目直教重
見北堂春

為規侍者畫天台圖

風雨祗園夜寂寥對僧燃燭畫山椒眼明認得天台路有箇行
人到石橋

題十六應真圖

人三元自有神通步都行怖畏空不是脚跟能踏實如何到
得大江東

題陶靖節賦詩像

歸來不負酒并琴幽鳥南山伴好吟一自卷中書甲子釣璜千
古不同心

題諸葛武侯草廬像

天挺神明不世姿當時出處係安危三分事勢勞籌筆未出隆
中也自知

題秋山樓觀圖

萬朵芙蓉在屋頭白雲堆裏見層樓題詩忽憶雲門寺幾度尋
僧八月遊

題宣和馬圖

龍姿鳳質滿中原盡蹴秋風度海門一匹不來踐霜雪沙場青
草自黃昏

題施雅山所藏宋端孝公主所賦桂花詩便面手卷後
就用其韻三首

宋周漢國端孝大長公主理宗女也其所自題桂花詩便面
以碧紗為襯所織折桂淡然與金月輝映自是宮製絕俗可
知而東廬王野叟名琦字德玉所識有云在武林時與故舊
劉公仲昂邂逅茶話劉廊王孫因及楊中齋駙馬事故出此
見遺乃是吾家婦之母之筆也藏于篋笥凡三十六年而外
孫施宜之其先有兄弟並舉進士者有雙桂堂尚在堂扁政
與扇合誠可以再為其後來者識故裝褫為卷筆其顛末併
製桂香詞于後以予焉且曰貴主題此扇時猶未出閤天上
清芬世間何有則知前輩寶重之如此至隆山牟先生用韻

賦之有滿身風露不知寒之句尤極悽惋使人一讀無限感
慨今雅山處士亦既老矣所寶外家遺物又幾五十年自誦
雖獲夜光每棄弗顧而獨護此卷如新不忍去手時一出以
示人諷誦不輟其風韻又可知矣間屬堪賦之某惟前代閨
門舊物固是罕得然相傳之久殆百餘年而不出兩家當時
遺老又能詳記其事使更千百載足以起人之興懷於無窮
若雅山之寶此其意亦有在乎於是追次其韻遂併及而歸
之宜之雅山處士字云

一一方諸鏡樣團金壺霑墨豈無端萬年枝上天香盡遺恨青
天碧海寒

誰復風流闔鳳團天人丰骨想毫端楚吟翻泣銅仙淚共灑秋

風玉并寒

天水雙桂影團喜符桂識上眉端外家風采今猶在長嘯空
山鶴髮寒

題趙松雪出浴人馬圖

澡浴霜寒帶月嘶皎如飛雪度春泥圍人不可輕調御花萼樓
前曉仗齊

題趙松雪畫四首

江上晴天錦繡紋丹崖紅樹思紛紜毫端染得秋無際猶是蒼
梧幾片雲

王孫今代玉堂仙自畫茗溪似朝川如此青山紅樹底那無十
畝種瓜田

玉簫吹斷幾黃昏南國風流竟莫論帝子不悲秋色晚墨痕何
以著啼痕

竹色蕭蕭木葉齊石邊芳草迥淒迷斷猿落月愁何處政在黃
陵廟裏啼

題趙仲穆人馬圖

驥子如龍勢欲飛圍人猶著舊宮衣霜蹄踐雪花無數可是長
安道上歸

題陳慎獨竹樹圖

不見高年慎獨翁謾憑圖畫看幽叢石邊竹樹生寒碧好在蕭
條破墨中

題倪雲林竹樹圖

侵晨好在不梳頭寫此踈篁古木秋清氣逼人當不得歲寒誰與說風流

題衛明鉉林居圖

每因脫俗居林下更復題詩向畫中啼鳥落花空歲月閑雲流水漫西東

題徐士元釣隱圖

雲去鳥來還適意海枯石爛不移心
生澤畔吟

為王鳴吉題吳江送別圖

長向空江歎別離含毫猶賦畫中詩
流轉鮑時

題吳江春曉圖贈張伯奇還樵李

吳淞江上春初曉烟水微茫帶淺蕪
此落鴛鴦湖

題竹樹圖送陳君玉歸呂城

烟枿風篁亂墨痕依稀顏得埧南村
陰護子孫

題天台王思齊雪溪卷

憶昔山陰訪戴船滿溪晴雪思茫然
花別有天

題趙魏公揩癢馬圖

久忘爬刷向河汾抵樹摩身動晚雲
千載有誰憐駿骨展圖空

憶李將軍

題柯博士竹二首

后主錯刀無復見長公珠玉竟荒涼風雲盡捲篔簹谷若箇如君葉長

饒守風流清且貧珊瑚都入禁垣春奎章博士承恩日一一臨池寫得真

題黃道人畫

垢面野人頭似雪畫山應復畫衡茅幾株五老峰前樹箇箇如雲可結巢

為李可道題衛明鉉所畫樓臺圖

海上相逢憶舊遊更開圖面說丹丘玉簫吹老人間世獨倚烟

霞第一樓

題蘇小小真

錢唐江上月如眉楊柳新生二月時顏得當年美人面東風一曲麗春詞

為王明仲題木筆仕女圖

木筆花開春已深十分閨思向誰吟暖風吹破遊絲夢故折瓊芳比素心

題夾竹桃花畫眉

翠袖籠顰怯曉寒欲妍花貌苦無端黛蛾拂得春山遠不負飛鸞桂影團

題李安忠猿鵲圖

啼猿靈鵲賦難工
峽月河星思未窮
誰向楚臺愁寂寞
想趁殿却知風

題江臯會飲圖

日月撚清盃杓裏
江山都落釣船中
何人相對苦不飲
應是行吟澤畔翁

為王允同題家山荆溪圖

好山都在太湖西
滿路風烟棘刺迷
華屋燕飛今在否
市橋官柳不勝題

題陳慎獨所畫寒林竹樹圖

為嗟玉樹埋黃土
見畫題詩即斷魂
健筆清真如宿昔
滿林烟月對黃昏

題盧益脩所畫水仙花

盧郎吹笛向漚波
夢裏曾瞻帝子何
一自美人遺玉珮
至今南浦月明多

題陸季弘所畫碧桃花

玄都觀裏花如霧
曾弄參差引鳳還
幾度春風開劫外
不隨流水到人間
季弘能隱遯絕跡城府故云

題季弘畫竹

少年文賦已曾傳
畫竹風流老更妍
烟雨一竿生筆底
珠璣萬箇落簾前

脩：雙玉倚空青
翠羽鸞翎裊不停
好似皇英愁日暮
九疑如黛隔秋屏

題堅石林上人松下相

一得金剛體自然芙蓉萬朶立青天如何恰坐雙松下明月寒潭又說禪

題教上人所藏石壁高僧圖

了無寒暑與昏朝獨坐松根看沆寥萬丈懸崖顛倒立法身無等劫塵消

為堅上人題石林圖

海邊雲氣接鴻濛萬石林中見玉虹八月潮高秋滿樹看山輸與坐禪翁

為道公題夏山圖

紫翠峰巒雲霧裏瓊琚樓觀石林端何人曳杖巖頭去不畏松

風瀑沫寒

題盛子昭畫會琴圖

二子彈琴固有期空山石上坐移時至音不著人間聽却許松風澗水知

題孟仲良畫雪中才子

席帽羸駝抵朔風雪中驅策灞橋東幾時却向長安道到處題詩踏軟紅

為范克齊題張道士畫幀

魏公枝葉學長年曾逐仙人上九天幾見蓬萊水清淺歸來畫裏看山川

題倪雲林為薛鶴齋畫竹

雲林寫竹如琅玕我昔愛之長相看鳳凰去矣秋影獨白鶴歸
來遼海寒

諼花

一自北堂風雨深諼花萎矣思難任非干畫裏慵題句為感春
暉寸草心

為王明仲題倪雲林畫二首

東遊久不見倪寬落日秋風海樹寒一箇草堂偏窈窕玉猷於
我憶盤桓

叅差海樹珊瑚窈窕風篁翡翠翠分尚想君家清閼閣臨池誰
見搨我鴛羣

題王生畫幀

薄命長乘海上桴展圖驚見好林廬明年若遂歸耕計牛角膠
鮓管掛書

題盛子昭臨吳興公溪山釣船圖

著我春江聽雨眠漚波亭下水如天當時度得叅差玉吹起春
風滿釣船

題倪雲林畫

天末遠峰生掩冉石間沅澗落寒清因君寫得三株樹忽起孤
雲野鶴情

題江山臺觀圖

何處瓊瑤歌舞臺重三金碧向江開杖藜漁艇吾偏愛誰在崎
嶇浩蕩回

題衛明鉉所畫王子晉吹笙圖

巾袂翩 = 鶴背仙玉笙吹滿次寥天碧桃花上春風度應是人
間五百年

題張叔厚所畫羸女吹簫圖

吹動簫聲萬籟 飄 = 風露濕仙衣彩雲飛斷秦樓月却跨青
天五鳳歸

題佛圖澄應趙故實手卷

喃 = 說偈水迸空惚 = 山河夢寐中莫怪現前持敬畏水西千
載報春風

王明仲遊海雲蘭若折錦帶花貯餅中索賦絕句

舉手拈來笑似人海雲飛墮一枝春臨風看舞雙啣鳳安得徐

生便寫真

次韻賦王明仲分菊

就地分花入瓦盆南風吹雨晝昏 = 幾時簾幙秋香滿看引飛
來野蝶魂

次韻奉荅韓景中姍表戍淮見寄二首

離愁迢遞每相干勁草支風也自寒切莫凭高歎搖落舉頭見
日是長安

世路羊腸不可之強將情緒託新詩素絲黃黑岐南北政是長
悲痛哭時

倚樓次韻

江樓獨倚送斜暉水盡天南鳥獨飛風信晚潮吹酒醒頓無炎

汗濕練衣

次韻戲荅堅公賦木犀

青冥昨夜御天風採得金丹下月中
普散十方香世界莫教真
觀塞雙筒

賦小餅紅白梅花

冰肌自傲羅浮雪暈臉偏酣
太液春共立東風妬環珮珊瑚
倫玉較精神

從將性質比嫦娥看此霞裳阿姊何
凡戀詎能消酒暈媚人都
道得春多

水風烟月可同吟骨格絕殊冷
不禁著眼固憐陽艷愁到頭誰
得歲寒心

燒得丹成似日紅別來人世領春風
誰知非色非空界鼻管掀

天便不同坐間有舉陳考亭詩
嘗及此說故轉一語

題普大雲梅花水仙

玉質固難禁寂寞上人宋宗室
子自有此語香魂端可繼風流
緇塵自滿春

風面誰道王孫託遠遊

羅浮夢裏玉人遥湘水春深泣翠綃
喻得空王無上法諸天隨

喜作香飄

阿師能畫極清真自是金輝玉潤人
贏得蛟龍雙浦上師示五
寐處

雲飛去一作十分春

題日本僧所畫青山白雲

積水東來沂極天杯浮三萬覓單傳
等閑三昧都遊戲未識齊

州九點烟

題忻悅道所畫雲山招隱圖

忻拈杭人負才氣由江浙鄉貢北上京師既校藝春

官俄病卒士多惜之其性雅好畫山川樹石云

妙年文采有斯人
顏得雲山慕隱淪
天上玉樓成底夢
都門重哭李元賓

題陳昌言水月齋梅影圖

水月光中作淨觀
墨痕何事寓團圓
要知無色無香界
不著冰霜襲袂寒

牧心齋題壁示叔介

牧心齋裏坐來深
萬古原思直至今
化化生生無別事
但教馴狎莫虧侵

題劉商觀奕圖

平原亦有羅浮事
况爾樵逢奕局仙
劉畫李臨茅彥勒
桃花源記託陶傳

題和靜處士觀梅圖

咸平天地物皆春
容得先生賦隱淪
一夜湖山風月白
梅花千古亦傳神

予十年前自江右還吳下罹時艱阻不得遂遠道游
觀之志竟棲跡林泉間與山人野士處頗放意詩酒
以銷鎔凡滓耳而留連光景之歎多寓於咏歌然即
事寄情罔投工拙片言隻字無可成編者今年過海
上而從遊襄陽丘晉氏廼哀拾予詩得三百三十三
首剽為三卷以請識予自歎曰詩本性情關時命生
不逢偶濩落偃蹇故發窮愁悲諤之辭以自攄遣奚
足以形容而裨制作之雅邪是編雖成未必可傳所
謂適足貽覽者之哂云今年為丁未歲冬至前一日
玉屏山小樵虞堪識

